

वास्तविकतक आधार

संघारी, अप्णक जीवनक कुछ मूल्या बा? कि अप्णक जीवन शोक, चिन्ता, वाक्क दिक्क ओ विरक्त होरहल? का अप्णहन थाहाँ बा, मुलसे का हुइठा ओ कहाँ जैबी? या आज्झुह मुजैबी कलसे अप्णक आत्मा कहाँ जाइ? संघारी यी शरीर त मुर्दा हो। हमारम आत्मा रहटसम हम्र मनै हुइटी। हमन आत्मा छोटिकि यी शरीर मुर्दा होजैठा ओ गन्ढाइलग्ठा।

यी गन्ढैना मुर्दक लाग हम्र रातदिन परिश्रम कठी कलसे हमार भित्तर रना आत्मा जौन जाट्टीसे मनैया हो याकर बारेम कुछ सोचरखली?

का अप्ण जीवनसे हार खाक निराश ओ हतास होरली? कि मृत्यु, दुःख कष्ट पिरमर्का ओ अन्धकारक शक्तिसे डराक भयभित होरली? कि अप्ण देवीदिउँता, भूतप्रेतहुँक दुख देहीं सतैहीं कैक डरारली? या मै यी संसारम काजे जीतीबाटु, म्वार जीवनक अर्थ का बा कना प्रश्नले घरि-घरि घचघच्याराखल कि? अप्ण अशान्ति शोक, पिर मर्का, शंखा, गोलमाल ओ कष्टले डगर नैपाक अलमलारली कि?

जसहँक दिन बुर्ठा त सारा पृथ्वी ओ सारा सृष्टि अन्धकारक डरम पठा, तर जब दिन उट्टा त रातीक अन्धकारहन दिनक अजरारम परिवर्तन कैदेठा ओ सारा सृष्टिहन अन्धकारक डरमसे स्वतन्त्र बनादेठा। ओसहँक एककठोकेल सत्य ओ सद्भर रना सृष्टिकर्ता परमेश्वरक प्रवेशले हमार जीवनक दुख, पीर, शंखा अशान्ति ओ अन्धकारहन सुख शान्ति ओ ज्योतिम परिवर्तन कैदेठा। हमार जीवनहन सुख, शान्ति ओ मुक्तिक ज्योतिले भरदेठा। संघारी, शान्ति हम्र खोज्क पैना ओ कमाइ कैक पैना चिज नैहो। शान्ति पाइक लाग शान्ति देना एककठो केल सत्य सृष्टिकर्ता परमेश्वरक खाँचो हमार जीवन ओ घरपरिवारम बा। का हमार जीवन घर, परिवार ओ समाजम शान्ति बा? यिहाँ हम्र एककठो केल सत्य परमेश्वरक बारेम विचार करी, जे स्वर्ग ओ पृथ्वीक सब चिज सृष्टि कर्ल ओ हमन डाइक गर्भम रचल। परमेश्वरक रचना अचम्मक बा। डाइक कोमल गर्भ भित्तर एकठो लर्ककम हाडक विकास कसिक हुइठा? भँस कन्या रठ, घाँस काइल खैठ, दुध उज्जर ओ गुरी देठ यी फे त अचम्म हो। हुइना त कत्रा मनैन्हकठे परमेश्वरक बात बट्वाइबेर अन्धहन इन्द्रेणीक रङ्गक सुन्दरता कहअस या आज्झुक दिन सफा बा, दिन झक्क बा कहअस केल हो। आन्धर रलकओसे यी सब बात ऊ बुझ नैस्याकट्। असहँक आत्मिक आन्धर रलकओसे परमेश्वरक बात बुझ नैसेकजाइट्। कत्राजहनसे परमेश्वरक बात बट्वाइबेर अन्धहन रातिक अन्धकारम बारल लालटिन देक मजासे जाओ कहअस केल हुइठा, तर हम्र यी बात बुझपठा कि साँचो ओ सत्य सृष्टिकर्ता परमेश्वर एककठो केल बाट। यदि सृष्टिकर्ता परमेश्वर धेर

रट ओ सत्य फे दुइठो रहट कलसे भारतम मनैन्हक मूह ओ आँख पाछओर ओ हमार आघओर हुइपर्ना रह या त यिहाँ पुरुषहुँक ओ और देशम स्त्रीहुँक गर्भधारण करपर्ना रह। या नेपालम सुङ्घना काम कानले ओ और देशम नाकले या खैना काम आँखले ओ हेर्ना काम मुहले कर्ट कलसे परमेश्वर हजार ओ सत्य फे दश हजार बा कैक विश्वास कर्ने रलही।

परमेश्वरक रचनक एक्क नियम ओ एक्क विधि बाटन कलसे परमेश्वर किसिमकिसिमक ओ धर्म किसिमकिसिमक कसिक हुइल्? धर्म देशक कानून नैहो। ओ विभिन्न देशक शासकहुँक ईश्वर नैहुइट, काकरकि देश-देशक शासक ओ नियम कानून फरक बा। परमेश्वर ओ धर्म धेर बा कठी कलसे अप्त भ्रमम परलबाटी। धर्म कलक साँचो सत्य परमेश्वरहन धारण कर्ना हो कलसे परमेश्वर एक हजार नैरट। सत्य ओ साँचो परमेश्वर हेरफेर अदलबदल नैहुइट। यदि अदलबदल हेरफेर हुइना हो कलसे भैँस रुखम चिहुर्ना ओ बाँदर भुइँयँम रना, छेग्री पानीम पहुँर्ना ओ मच्छी खवारम रना हुइपर्ना रह। यी सब सृष्टिक शुरुसे अस्तहँ बा। शुरुसे अन्तसम परमेश्वर एकनास बाट। उहाँ सारा सृष्टिक संरक्षक हुइट। परमेश्वर पृथ्वी ओ स्वर्गक मालिक हुइट। उहाँहन कुछ् चिजिक खाँचो नैहुइटना। उहाँ सर्वसम्पन्न बाट। तर हमार आवश्यकता परमेश्वरक आघ चिम्टहन प्यास लाग्क समुद्रक पानी पिए गइलअस हो। समुद्रक एक गिलास पानी काहार्क चिम्टहन देलसे चिम्टा डुब सेकी, पुह सेकी। ओत्रा पानी वाकर आवश्यकतासे बहुत हुइटस। तर एक गिलास पानी झिँकटीम समुद्रम कौनो किसिमक घटी-कमी नैहुइट। ओस्तहँक परमेश्वर हमन दया ओ आशिष दिहवेर हमार आवश्यकतासे प्रशस्त हुइठा। तर परमेश्वरक दया ओ आशिषक भण्डारम कौनो किसिमक घटि-कमी नैहुइटना। जसहँक लद्या बहक नैडट्कर्ट ओस्तहँक हमार परमेश्वर दया, भलाइ ओ आशिष देक नैडट्कर्ट। हम्र उहाँक सृष्टि रलक कारण हमार आपन दिन-दिनक चालचलन, काम-काज, बोली, व्यवहार, रहन-सहन उहाँहन मनपर्ना बनाइक लाग आपन जीवन समर्पण करपर्ठा।

परमेश्वर यी पृथ्वीम रहल सारा मानव जातिन्हक रचना कर्ल। परमेश्वर संसारक सारा देशक नर-नारी या मानव जातिन विशेष उद्देश्य ठैक सृष्टि कर्ल, कि सबजन परमेश्वर बाबा कैक चिन्हँट। उहाँ हमनसे दूर नैहुइट, काकरकि उहाँ सर्वव्यापी, सर्वज्ञानी, पवित्र, सर्वशक्तिमान ओ दयाले पूर्ण प्रेमी परमेश्वर हुइट। उहाँहन हम्र हमार बाहिरी आँखले द्याख नैसेकटी। तर हमार आँख बनुइया हमन देख्ठा। का आँख बनुइया द्याख नैसेकहीं? का कान बनुइया हमार पुकार नैसुनहीं? का हाँठ बनुइया काम कर नैसेकहीं? जे हमार मूह बनाइल, उहाँ हमनसे बोल्ठ। जे हमार हृदय बनाइल, उहाँ हमार बारेम साँचविचार कर्ठ। मनैन्हक दिल-दिमाग बनुइया परमेश्वर जाट्रिसे सर्वज्ञानी बाट। हमन बनुइया परमेश्वर सर्वज्ञानी बाट। मनैन्हक बनाइल

एक्सरे मनैन्हक भित्तर नुक्क रहल रोग-खराबी, टुटल-फुटल ज्या-जसिन बा ओस्तहँ देखादेठा। परमेश्वरक आँख त झन लाखौँ गुणा तेज बाटन। उहोओसे परमेश्वरक नजरम हमार कुछु चिज फे नुक नैस्याकट। हमन साँचना शक्ति देहुइया हमार बारेम नैसाँचक रहसेकहीं?

सत्य सृष्टिकर्ता परमेश्वर एक्कठो केल बाट, उहोओसे स्वान, चाँदी, कठ्वा, पत्थक मूर्तिहन परमेश्वर कैक विचार कर्ना कहाँसम्मक भूल हो? हम्र हमन बचुइयहन नैपुजक, वाकर सटाहा मूर्ति बनाक पो पूजा कर्तिवाटी। मूर्तिक सुन्दर आँख त रठस, तर हम्र जाक वाकर सामनेम रुइबेर हमार दुःखक अवस्थम वाकर आँखिमसे एक बुन्डा आँस नैअइटस। मूह त बाटस, तर हमार लाग एक शब्द नैबोलदिहट। हृदय त हुइबो नैकरस हमार बारेम का साँच्दे? गिरल कलसे अप्पन्हे उठ नैसेकुइया हमन कसिक सहायता करी? संघारी, हमन परमेश्वर बनैना हो कि हम्र परमेश्वरहन बनैना हो? हम्र परमेश्वरहन नैचिन्हल् ओ नैजानलओसे भ्रमम पर्क विभिन्न जीवजन्तुन्हक मूर्ति बनाक पूजा कर्ठी। परमेश्वरहन हमार अज्ञानताले सुवरक औतार कैक पूजा कर्ठी। कौनोजहन हम्र सुवर कबी कलसे उ गाली बेजती, अपमान ओ शत्रुतक व्यवहार हुई। असहँक हम्र फे परमेश्वरसे विभिन्न मूर्ति बनाक साँप, गोरु, पशु कैक अपमान ओ शत्रुतक व्यवहार कैरखली। उहोओसे जौन परमेश्वरप्रति शत्रुतक व्यवहार कैरखली आझुह उ सब छोर्क परमेश्वरकओर घुमी। हम्र देशक राजा, मन्त्री ओ हाकिमन टुह्र सुवर या बाँदर हुइटो कलसे गाली बेइज्जती, अपमान ओ मानहानी करल ठहर्क सजायक भागी हुइबी कलसे का परमेश्वरहन गोरु, पशु ओ सुवर कलसे परमेश्वरहन अपमान करल सजायसे कसिक उम्कबी? या अप्नहन कौनो मनै गोरु, सुवर, कुक्कुर बाँदर कहीं कलसे ओसिन मनैन अप्न सजाय देबी कि इनाम? उहोओसे मूर्ति पूजा कर्ना आशिष पैना नाहि, श्राप पाजैठा। उहोओसे एक्कठो केल साँचो सत्य परमेश्वरहन पूजक लाग अप्नहुँकर सारा मूर्तिपूजक काम छवारपठा। एक्कठो केल सत्य परमेश्वर एक प्रकारले केल पूजनाहुँकन खोज्ठ, जे आत्मम ओ सत्यतम परमेश्वरहन पूज्ठ। और बनाइल मूर्ति पूजुइयन परमेश्वरक नजरम घिनलग्ठिक बाट ओ मूर्ति पूजुइयन सारा मनैन परमेश्वर दण्ड देहीं। जौन परमेश्वर हमन असल ओ खराब छुट्याइसेकना विवेक देल, उहाँ एक-एक मनैन्हक न्याय करहीं।

परमेश्वर पहिलहँ एकठो दिन टोकरखल, जब उहाँ यी संसारम रहल मनैन्हक न्याय करहीं, उ दिन एक्कठो केल परमेश्वर हरेक मनैयक वाकर काम अनुसार ठीक न्याय कर्नेबाट। उ दिन मनैन्हक विचार अनुसार मजा लगना, नैलगना बात नैहो, तर परमेश्वरक सत्य नियम अनुसार हरेक मनैयक न्याय हुइने बा। उहोओसे अप्नहुँकन्हक दुष्ट काम, बोली, व्यवहार आब्वहँ छोरदी। एक्कठो केल सत्य परमधन्य परमेश्वरहन पूरा मनले खोजी। साँचो सत्य परमेश्वरक

सत्रुतक सम्बन्धसे हट्क उहाँक संघारी ओ सन्तान बन पैनासे आनन्दक बात और का हुइसेकी जे? उहोओसे सत्य सृष्टिकर्ता परमेश्वरहन छोर्क सृष्टिक पूजा नैकरी। काकरकि मूर्तिपूजा कर्ना कलक सृष्टिहन पूज्क सृष्टिकर्ता परमेश्वरहन छवारल प्रमाण हो।

वास्तविकतक आदर्श

एक्कठो केल साँचो सत्य सदासर्वदक जीवित परमधन्य सृष्टिकर्ता परमपिता परमेश्वर आपन सृष्टि करल हरेक प्राणीन् उहाँक नियमअनुसार चलक लाग आदेश देठ।

परमेश्वरक नियम लिखल अनुसार टर बाटन:- परमेश्वर मनैन दश आज्ञा देरखल, जौन आज्ञा यी धर्तीम रहल हरेक मनै पालन कर्लसे धेर फाइदा बा। यि आज्ञा मनैन शुद्ध, पवित्र ओ असल चरित्रवान होक परमेश्वरम आपन जीवन समर्पण कैक उह अनुसार जिए सिखाराखल।

यी अज्ञा परमेश्वरसे, और मनैनसे ओ आपन जीवनसे कसिक व्यवहार करपठा कैक स्पष्टसे सिखाराखल।

संघारी, यी संसारम देशक राजा, शासक या कानून नैमन्लसे या उलङ्घन करलम वाकर सजायसे उम्क नैसेकटी कलसे परमेश्वरक आज्ञा नैमन्लसे इन कसिक उम्क सेकबी? देशक कानून नैमन्ना मनैयहन उ देशक शासक न्याय कठ। ओस्तहँक परमेश्वर फे उहाँक आज्ञा नैमान चहना मनैन्हक न्याय करहीं।

पहिला आज्ञा: परमेश्वर कठ, “टुह मही छोर्क और कोनौ देवी-दिउँतन्हक पूजा जिन करहो या जिन मनहो।” मनै एक्कठो केल साँचो सत्य सृष्टिकर्ता परमेश्वर जे सक्कु चिज ओ मनैन सृष्टि कर्ल, उहाँहन चिन्हँट ओ उहाँक केल पूजा करट् कना चहठ। संघारी, यदि अप्नक जन्नी अप्न रटिरटी और पुरुषसे लागी कलसे अप्नहन कसिन लागि? ओस्तहँक हम्र फे आपन सृष्टिकर्ता परमेश्वर रटिरटी मूर्तिपूजा कर्ना कहाँसम्मक दुष्ट काम हो? मूर्ति मनैनसे पाछ मनैद्वारा बनागैल् हो। मनै परमेश्वरद्वारा बनागैल् हुइट।

दोसर आज्ञा: परमेश्वर कठ, “कौनो किसिमक फे मूर्ति जिन बनैहो। आकाश ओ धर्तीम रहल कौनो चिजहन फे पूजा जिन करहो। मूर्तिक आघ कौनो चिज फे प्रसादक रुपम जिन चहैहो। काकरकि मूर्तिपूजा कर्ना या हुँकन्हक आघ झुक्ना श्रदा, भक्ति कर्ना परमेश्वरक आघ पाप हो।”

हम्र एककठो केल सत्य साँचो सृष्टिकर्ता परमेश्वरहन पूजपठा। हमन बनुइयहन पूजा नैकैक हम्र मूर्ति बनाक पूजा कर्ना कहाँसम्मक भूल, भ्रम ओ अन्धकार हो?

का मनै परमेश्वरहन बनाइसेकठ? या उहाँहन गोरु, सुवर, बाँदर, साँप कना कहाँसम्मक पाप हो? संघारी, अप्नहन कौनो मनै नमस्कार बाँदर या सुवर कलसे कसिन लागि? विभिन्न जीव-जन्तुन्हक मूर्ति बनाक परमेश्वरहन पशु ओ जनावरन्हक रुप देना यी पूजा नैहो तर गाली बेइज्ती ओ अपमान हो। परमेश्वरहन अपहेलना करल हो। असिक कर्ना सन्तान ओ वाकर तीन चार पुस्तासमन परमेश्वरक रीस, श्राप ओ दण्ड पर्नेबाटना। हमार छाइछवान्हकम ओ हमार जीवनम हम्र परमेश्वरक श्राप चहठी कि आशिष? आज्जुह विचार करी। काकरकि उहाँहन श्रद्धा भक्ति ओ आराधना कर्नाहुँकन्हक हजार पुस्तासमन आशिष पैठ, उहोओसें आज्जुह विचार विचार करी।

तीसर आज्ञा: परमेश्वर कठ, “म्वार नाउँ बिनापट्टक जिन लेहो ओ अपमान अनादर जिन करहो।”

चौथा आज्ञा: परमेश्वर कठ, “छ दिनसम मनै कामधन्डा करट् ओ सातवाँ दिनम विश्राम कैक एककठो केल सत्य साँचो सृष्टिकर्ता परमेश्वरहन पूजा आराधना उपासना ओ भक्ति करट्। सातवाँ दिनहन परमेश्वरक आराधना उपासनक लाग अलग करहो।” का हम्र यी अनुसार कैरखली?

का हम्र यी चारठो आज्ञापालन कर्टीबाटी? का हम्र एककठो केल सत्य साँचो परमेश्वरक आराधना उपासना कर्टीबाटी? कि मूर्तिपूजम अलमलैल बाटी? यदि हम्र परमपरागत ओ आपन डाइबाबन्ह शिक्षा अनुसार या परमेश्वरक निति नियम थाहाँ नैपाक आजसम फे मूर्तिपूजा कर्टी परमेश्वरहन पत्थर, रुखा, कठ्वा, गोरु, पशु ओ बाँदर कैक पूजा कर्टीबाटी कलसे हम्र परमेश्वरहन अपमान, अनादर, गाली बेइज्ति कर्टीबाटी। असिन कर्ना भारी अधर्म या पाप हो। का हम्र हमन गोरु, पशु, बाँदर कहुइयनसे खुशी रबी या हुँकन आपन घरम स्वागत कर्बी? कि हुँकनसे रिसैबी? हमनसे असिन व्यवहार करुइयनसे हम्र सद्क लाग सम्बन्ध टुर्नेबाटी। असहँक परमेश्वर फे उहाँहन नैपूजक मूर्तिपूजा करुइयनसे सद्क लाग सम्बन्ध टुक्राक अनन्त सजाय “नर्क”म पुगादेहुइयाबाटा। जेहिहन आत्मिक (अध्यात्मिक) मृत्यु कैजिठा। मुना कलक सद्क लाग सम्बन्ध टुट्ना हो। संघारी, का अप्न परमेश्वरसे सद्क लाग सम्बन्ध टुटाइ चाहटी?

पाँचवाँ आज्ञा: परमेश्वर यी कठ कि, “डाइ-बाबन्हक आदर करो ओ हुँकन्हक आज्ञापालन करो।” आज्ञापालनक अर्थ यि निह्वाए कि हम्र परमेश्वरक इच्छक विरोधम मन्त्र-तन्त्र, भूत-प्रेतन्हक पूजा-आँटि फे करपरा। हम्र खालि परमेश्वरक आराधना केल करपठा। काकरकि मूर्तिपूजा कर्ना कलक परमेश्वरक विरोधी बन्ना हो। जस्त- कौनो मनैया रिसाइल कलसे गोरु, पशु कैक अनादर, गाली या उसकठा कलसे आबसे कौनो जन फे असिन काम कर्ना परमेश्वरहन अनादर हुइना बात कर लागाइ कलसे हम्र होशियार रही।

छठवाँ आज्ञा: परमेश्वर कठ, “हत्य जिन करहो।” हत्या कलक कौनोफे बदला, रीस, डाह, निन्दा अपमान आदिले करबेर कैफ्यारा मनै हत्या कर पुगल रठ। असिन अपराधहन हाँसी मजा, खेलाँचीअस सम्झल रठ। मनैन्हक धार्मिकतारहित पतित अवस्था जो पापपूर्ण स्वभाव हो। आज संसारम हुइल् सब किसिमक पाप, अपराध, गडबडीक कारण फे मनैन्हक हृदयक पाप जो हो।

सातवाँ आज्ञा: परमेश्वर कठ, “दुह व्यभिचार जिन करहो।” हम्र कौनो फे महिलन व्यभिचारक भावनाले ह्यार नैपरट्। हमार मनक सोचविचार, मन भावना ओ कल्पना यी सब परमेश्वर स्पष्टसे द्याख सेकठ। हम्र यी आज्ञक विरोधम कुछु सोचविचार कर्टीबाटी कि? व्यभिचारक पाप शुरुम सुन्दर मैया-प्रेमक रुपम देखपठा। यहिम घृणक कुछु सम्बन्ध नैरहट्। हमार शरीर परमेश्वरक मन्दिर हो। परमेश्वरक मन्दिरहन असिन अनैतिक पापले नाश करुइयन परमेश्वर फे हुँकन नाश करहिन। बाइबल कठा, “व्यभिचार करुइय बुद्धि नैरहल मुख हो। ऊ आपन प्राण नाश कठा। मनैन्हक आत्महन नर्कम लैजिना शैतानक सबसे बल्या हतियार व्यभिचार हो। कौनो फे व्यभिचारी कौनो फे महिलन या पुरुषन शुद्ध भावनाले नैहेरहट्।

आठवाँ आज्ञा: परमेश्वर कठ, “च्चारकाम जिन करहो।” नेपाली कहाई बा चोर चकार घर उजार कब्बु फे नैमजा रहट्। “घर उजार” कलक औरजन्हक घर उजार पर्ना काम हो। च्वार कहाँ बैसठ? चोरोक बाबक नाउँ का हो? याकर सही उत्तर यी हो चोरोक बाबक नाउँ ल्वाभ हो। च्वार मनैन्हक मन भित्तर बैसल रठ। ल्वाभले चोरोहन जन्म देठा। मनैन्हक मनम रहल ल्वाभ जो नानाथरिक पाप जन्मैठा।

संघारी, संसार मुस्वा मर्ना एकठो साँचाअस हो ओ संसारम रहल चिजजुन मुस्वा पर्ना साँचम ढरल खैना चिजअस हो, जौन चिजहन पाइक लाग जाइबेर उहँ फँस्क नाश होजैठी।

नवाँ आज्ञा: परमेश्वर कठ, “झूट जिन बोलहो।” परमेश्वर पवित्र ओ सत्य हुइलकओसे झूटहन घृणा कठ।

दशवाँ आज्ञा: परमेश्वर कठ, “टुह टुन्हक छरछिमेकीन्हक जन्नी, जग्गा-जमिन, गोरु-भैस या कुछु चिजिक फे ल्वाभ जिन करहो।” परमेश्वर हमन ज्या-जत्रा देरखल ओइहेम सन्तुष्ट रहपठा। जसहँक पुतलीन दिया देख्क वाकर अजरारम आकर्षित होक दियम फन्कठ त जर्क मरजैठ, ओसहँक आज यी संसारक चिजिक लोभ-लालच ओ आकर्षणले करबेर दिनक लाखौँ मनै पापम पर्क नाश होरल। संसारक चिजिक ल्वाभ बैयरिक काँटक झोङ्लीअस हो, उ काँटम फँसलसे निक्रना मुस्किल हुइठा। कोररोगक कारण मनैन्हक शरीरम स्पर्श शक्ति या शरीर लाट हुइलकओसे डहबेर, छुवबेर थाहाँ नैपाजाइत्। ओस्तहँक पाप अधर्मक कारण मनैन्हक मन, दिल दिमाग कुछु थाहाँ निपैना लाट विचेत हुइल् रठा। असिन हुइल् अवस्थम मनैन मुलसे कहाँ जैबी कैक पुछलसे थाहाँ नैहो कठा आत्मा का हो? परमेश्वर के हुइट कना कुछु थाहाँ निहुइटन ओ परमेश्वर जिन करहो कना बात कर्ल रठा। संघारी, हम्र मनैन्हक लिखल साइनबोडम या कहल बातम विश्वास कठी कलसे परमेश्वरक कहल बातम कसिक शंखा कर्ना? काठमाण्डौसे पोखरा २०० किलोमिटर बा कना लिखल या कहल बातम विश्वास कठी कलसे परमेश्वरक कहल बातम झन कसिक शंखा कर्ना? प्रिय संघारी, हम्र परमेश्वरक दिहल यी आज्ञामसे कौनो एकठो आज्ञा उलङ्घन कैक दोषी होरली कि? यदि सक्कु आज्ञापालन कैक एकठो आज्ञा केल हुइलसे फे चुक्ली कसले सक्कु आज्ञा नैमानल बराबर हो। ओ हम्र परमेश्वरक आघ दोषी ठहर्नेबाटी। संघारी, उप्पर लिखल दशठो आज्ञामसे कौनो एकठो भङ्ग कैरखली कलसे परमेश्वरक क्रोध ओ श्राप हमारम पर्ने बा।

काकरकि परमेश्वर कैरखल, जौन प्राणी पाप करी ऊ मुक नरकम जाई। सक्कु आज्ञा मान्क उहिमसे एकठो केल चुकबी कलसे उ सक्कु आज्ञा नैमानल बराबर दोषी ठहर्ने बाटी। संघारी, एक दिन हमार सारा जीवनभरिक सक्कु बातक न्याय हुइने बा। परमेश्वरक आघ सबजन ठहऱ्याइ पर्नेबा। संसारक अदालतम घुस देक अप्णक दोषहन निर्दोष बनादेहीं, तर परमेश्वरक आघ घुस-पेश ओ सिफारिस नैचलने हो। दुधक दुध, पानीक पानी छुट्याजैने बा। का अप्ण अप्णहेह मै धर्मी बाटु कैक सम्झल बाटी? का अप्ण बोली-वचन, चाल-चलन ओ सोचविचारले फे पाप कर्ल नैहुइटी? का अप्ण रीस, क्रोध, निन्दा ओ झूट बोल्ल नैहुइटी? यदि अप्ण अप्णहेहन धर्मी समझ्क म्वारम कुछु पाप नैहो कठी कलसे अप्ण झूट ब्वालटी। यह झूट्ठा पाप अप्णकम बा, परमेश्वरक सत्य अप्णक नैहो। अप्ण परमेश्वरक दण्डसे उम्क निपैने हुइटी। ओसिन हो कलसे हम्र पापमसे मुक्ति पैना उपाय नैहो का? संघारी, परमेश्वरक क्रोध ओ दण्डमसे बँचना एकठो अचम्मक उपाय बा, उ मै अप्णहुँकन कहम।

वास्तविकतक सुमार्ग

संघारी, हमार लाग एककठो केल साँचो सत्य जीवित परमेश्वरकठे पुगना एकठो उपाय बा। पाप अपराधक डरलग्टिक दण्डसे बँचना हमार लाग एकठो उपाय बा। उ हो खालि येशू ख्रीष्टद्वारा, हम्र उहाँद्वारा केल पापक दण्डसे बाँच सेक्टीबाटी।

संघारी, साँचो सत्य परमेश्वर आपन दया ओ प्रेमम हमन सृष्टि कर्लह। तर हम्र परमेश्वरक पवित्रतक विरोधम पाप कर्लक कारण आपनउप्पर दुःख शोक ओ अनन्त मृत्यु आनरखली। उहओसे परमेश्वर हमन असिन किसिमक दुःख-कष्ट ओ अनन्त मृत्युमसे बचाइक लाग एकठो डगर तयार पारदेरखल।

परमेश्वर अपन्हे मनैन्हक रूप लेक यी संसारम येशू ख्रीष्ट होक प्रकट होरल ओ हमार पाप अपराधक दण्ड आपनम लेक वलिदानक वेदी, जौन कलवरीक क्रूस हो उहाँ हमार पापक लाग आपन जीवन वलिदान कर्ल। बिना वलिदान पाप क्षमा नैहुइट, काकरकि परमेश्वर पापक दण्ड देनेबाटा। परमेश्वर पवित्र बाटा। उहाँ पाप अधर्महन घृणा कर्ल। परमेश्वर न्याय कर्ल। उहाँ पापक उचित दण्ड देनेबाटा। परमेश्वर प्रेमी बाटा। मनैन्हक पापक क्षमक उपाय क्रूसक वलिदानद्वारा कैरखल। संघारी, हम्र बोली-वचन, व्यवहार, मन, सोचविचार ओ कामले पाप कैरखली। पापक दण्ड अनन्त नर्कसे येशू ख्रीष्ट बचैनेबाटा। उहाँ हमार पापक लाग वलिदान हुइलह कना बात स्वीकार कर्ली उहाँहन आपन जीवनम प्रभु ओ मुक्तिदाता कैक विश्वास कर्ली कलसे सककु पापक क्षमा पाक अप्न सद्क लाग स्वर्गम परमेश्वरसे बैस पैनेबाटी। काकरकि पाप क्षमाबिना कौनो जन फे स्वर्गम परमेश्वरसे बैस पैनेनैहुइट। पाप क्षमाबिना कौनो जन फे स्वर्गम प्रवेश कर नैपैट। संघारी, संसारम फे हमार घरम तालाकुँजी, बल्या झ्याल-दुवाका काकर बनारखली? च्वार, डाँकन चोर्क लैजैहीं कैक नै हो का? स्वर्ग त झन और बात होगिल्। यह संसारम त च्वार, डाँकन भिट्टर पैँठक् डर झ्याल-दुवाका, तालाकुँजी लगाइल रठा कलसे, स्वर्गम पापहँ लेक जाइक लाग का स्वर्गक ड्वार खुल्ला रही? कौनो धर्मी मनैया जेहीहन अप्न चिन्ठी अप्नक घर आइबेर का अप्न ड्वार बन्ध कर्ली?

परमेश्वरक एककठो केल छावा, परमेश्वरकसँग स्वर्गम विराजमान रलह। उहाँ पाप, अधर्म, अन्याय, अत्याचार कना बात येशू ख्रीष्ट अनुभव नैकर्ल रलह। स्वर्गक स्वर्गिय आनन्दसे अलग होक कब्बु फे जिय परल नैरलहन।

तर परमेश्वर अपन्हे मनैन्हक रुपम येशू ख्रीष्ट होक आजसे लगभग दुई हजार वर्ष पैल्ह स्वर्गिय प्रकारले, परमेश्वरक शक्तिले पूर्ण पवित्रताम, पवित्र आत्माद्वारा कुमारी कन्यकमसे जन्मला। काकरकि उहाँक डाइक कौनोफे पुरुषसे सम्बन्ध (सहवास) सम्पर्क नैरहलहना। तर हुँकनहिन एक रात स्वर्गदूत दर्शन देक कैरखलह, “टुँ गर्भवती हुइनेबाटो ओ एकठो छावा जन्मैनेबाटो उहाँक नाउँ “येशू” ढरहो। येशू नाउँक अर्थ मनैन हुँकन्हक पापमसे मुक्ति देना मुक्तिदाता हो।”

१ पापी स्वभाव बाबकमसे लर्कन्हकमसम पुगठा डाइकमसे नाही। यदी येशूक मानवीय बाबा रलसे उहाँकम मुक्ति देना शक्ति नैरने रलहना। काकरकि पापक क्षमा ईश्वरीय शक्तिसे केल हुइठा।

२ डाइक स्वभाव लर्ककम प्रवेश नैकलना। परमेश्वरक छैह्याँ ओ पवित्र आत्मासे येशू नैजन्मलरट कलसे पवित्र नैरने रलह ओ कन्यकमसे नैजन्मलसे एकठो यशैया अगमवक्ता ७४० वर्ष पैल्ह कन्यकमसे एकठो मुक्तिदाता जन्मुइयाबाट कैक करल भविष्यवाणी पूरा नैहुइने रह ओ मनैन्हक करल पापमसे मुक्ति पैना उपाय फे नैहुइने रह।

३ कन्या कुमारीकमसे येशू ख्रीष्ट नैजन्मलरट कलसे पापमसे मुक्ति पैना कुछु उपाय नैहुइने रह। हमार अपराध पापकसँघ नरकम पर्नेरलही ओ येशू ख्रीष्ट पवित्र आत्मासे नैजन्मल रट कलसे हमार आत्मक मुक्ति फे असम्भव हुइने रह।

४ यदि ख्रीष्ट कन्या केटीकमसे नैजन्मलसे मुक्तिदेहुइया हुइनैसेकने रलह ओ बाइबलम येशूक बारेम लिखल हजारौँ भविष्यवाणी पूरा नैहुइने रह।

५ येशू ख्रीष्ट पवित्र आत्मासे गर्भम रलकओसे उहाँकम परमेश्वरक आत्मा पलरलन ओ असिक जन्म हुइलक कारण पापी ओ दुष्ट मनैन्हक पतित स्वभावल येशू ख्रीष्टकम प्रवेश कर नैपैलन।

६ कौनो फे पति-पत्नीक सहवासक परिणामले जन्मल मनैया मनैन्हक उद्धार कर नैस्याकट। मनैन्हक पापमसे मुक्ति दिहक लाग सहवास बिना पवित्र आत्मासे जन्मल् हुइपठा। संसारम कामवासनले जरल मनै केल कामवासनामसे जन्म पठा कैक कठ। तर परमेश्वरक नियम ओ मनैन्हक सोचविचार एकदम फरक बा।

७ प्रिय संघारी, यिहाँ मै एकठो प्रश्न पुछ चाहटु। कौन पैल्ह हुइल्हुई मुर्घी कि मुर्घिक अण्डा? यदि मुर्घि पैल्ह हो कलसे अण्डा बिना चिङ्नी कसिक बनल? ओ अण्डा पैल्ह हो कना हो कलसे चिङ्नी बिना हुइल अण्डा कसिक हुइल्? संघारी, परमेश्वर सर्वेसर्वा ओ सर्वशक्तिमान बाटा। उहओसे उहाँ संसारक नियमसे उप्पर रलक कारण बिना अण्डा ओ मुर्घा मुर्घिन्या बिना मुर्घा ओ मुर्घिन्या सृष्टि कर्ल। यदि हमार सोचविचार अनुसारक नियमक बन्धनम परमेश्वर पर्लसे परमेश्वरहन असिक सृष्टि कर मिलने नैरलहन। ओ आज यी संसारम चिरैँचुरुड ओ जीवजन्तु कना कुछु नाउँ निशान रने नैरलह। संघारी, मनैन्हक आदि माता पिता कसिक ओ कहाँसे आइल हुइहीं? रुखक बीया पैल्ह कि रुखा पैल्ह? याकर उत्तर बाइबल देठा। माता-पिता ओ रुखा-बरेखा परमेश्वर सृष्टि कर्लह। उहओसे उह माता पितामसे मनैन्हक शुरु हुइल्। उह रुखमसे फलफूल अनाजक बीया हुइल्। यदि परमेश्वर प्राकृतिक बन्धनम पर्ट कलसे मनैन्हक आदि माता-पिता नैरनेरलह। आज यी धर्तीम मनै कना नाउँ निशान नैरनेरह। ओ बोट-बिरुवा अनाज कना फे नैरनेरह। यदि परमेश्वर रुखा-बरेखा, बोट-बिरुवा, फलफूल, अनाज आदि सृष्टि नैकर्ट कलसे हम्र भुँखमुने रलही। ओस्तहँक ख्रीष्ट येशू भविष्यवाणी अनुसार कन्या केटीकमसे पवित्र आत्माद्वारा मनैया होक अइल ओ मनैन्हक पाप अपराध ओ अधर्मसे छुटकारा दिहक लाग वलिदान नैहोदेट कलसे हम्र सद्क लाग अनन्त नरकम नाश हुइनेरलही। मनैन्हक लाग फलफूल अन्नक बीया बिना रुखा-बरेखक सृष्टि कर्ल। ओसहँक कामवासना (सहवास) बिना कन्या केटीकमसे येशू ख्रीष्ट जन्मल, ताकि हम्र पापक बन्धनमसे मुक्ति पाइसेकी। असिक येशू ख्रीष्ट जन्मल ओ उहाँ बहर्तीगैल। मनैन्हक लाग भलाइक काम कर्तीगैल। उहाँ निरन्तर यी धर्तीम पवित्र जीवन जिल। यी संसारम रहबेर उहाँ नानाथरिक पाप देखल ओ पाप अधर्मक विरोधी होक जिल। येशूक उमेर ३० वर्षक हुइबेर स्वर्ग राज्यक प्रचार कर्ती, मनैन “पापमे घुमो” कैक कल। येशू ख्रीष्ट मनैन हुँकन्हक धेर प्रकारक रोग-बेराम, कष्ट पीरमसे चोखैल ओ भूत लागल मनैन भूतनसे छुटकारा देल। जबसम मनै आपन पापमसे नैघुमहीं ओ परमेश्वरकम विश्वास नैकरहीं स्वर्गक राज्य हुँकन्हक लाग भारी दूर बाटन।

येशू ख्रीष्ट यी संसारम रहबेर उहाँक नाउँचलल् पण्डितहुँक येशूकम कुछु दोष नैभेटैल। हुँक उहाँकपर जलन, डाह ओ बिहमुक चूर रलह। काकरकि सब मनै उहाँक पाछ लागरलह ओ ऊ धार्मिक पण्डितहुँक छोगिला। ऊ पण्डितहुँक उहाँक विरोधम नैहुइल झुट्टा दोष लगाइलगल। उ दुष्ट मनै उहाँहन पकर्क न्यायधीसकठे लैगिल। न्यायधीस कुछु फैसला बिना कर्ल मनै उहाँहन ज्यान सजाय दिहपठा कैक हल्ला मच्चाइलगल। हुँक धर्मसे बहुत धन, मान इज्जतहन प्राथमिकता दिहट। येशूहन त हुँक डगरीम बैराइल काँटअस सम्झट। उहाँप्रति हुँकन्हक रीस, डाह

अत्रा जोरसे दन्कलन कि निर्दोष प्रभुहन क्रूसम मृत्यु सजाय देल। तर उहाँ निष्कलंक रलह। भविष्यवाणी अनुसार उहाँ मनैन्हक पापक क्षमक लाग क्रूसम बलिदान हुइहींपर्ना रलहन। येशू ख्रीष्ट सारा संसारक पाप, अधर्म, पीर, कष्ट आपनउप्पर बोक्क हमार पाप अधर्मक उद्धारक लाग क्रूसम बलिदान हुइल। मुवागिल, गारगिल ओ मुलक तीन दिनम गन्धमसे जी उठ्क चालीस दिनसम यी संसारम रल। येशू आपन चलनसे खानपीन फे कर्ल। क्रूसम बलिदान हुइनासे आघ जसहँ शरीरम रलह ठीक ओसहँ शरीरम मुवलमसे जील। उहाँ मुवलमसे जील त पाँच सय मनैनसे फे धेर मनै येशूहन क्रूसम मुनासे आघ जौन शरीरम रलह उह शरीरम देख्ल। उह शरीरम उहाँहन क्रूसम टाँगबेर उहाँक हाँठ, पाऊ ओ क्वाखम भालले ग्वाभल, बिरन्जी ठ्वाकल च्वाट देख्ल। हमार पापक लाग येशू प्रभु आपन जीवन बलिदान कैदेल। उहाँक दिहल बलि सिद्ध, पवित्र ओ ग्रहणयोग्य बा कना बात येशू मुवलमसे जीलक ओ शरीरम स्वर्ग गैलक घटनाले पक्का प्रमाणित होरहल। परमेश्वर पूजापाठ या कौनो जनावरक बलिदान भेटी, तीर्थ-वर्त या हमार पापक बदलम धर्म-कर्म ग्रहण नैकर्ट, काकरकि यि चिजले हमार पाप मेटाइ नैसेकजाइट्। साँचो सत्य जीवित परमेश्वर कठ, “टुन्हक धर्म-कर्म त मैल्याइल या फाटल झेल्लुद्राअस हो। असिन धर्मकर्म सब बिनकामक हो।” खाली येशू ख्रीष्टक बलिदानम विश्वास कैक केल सत्य परमेश्वरकठे पुग सेकठी। येशू ख्रीष्ट अप्पन्हे कैरख्ल, “डगर सत्य ओ जीवन मैहँ हुइटु, म्वारद्वारा बाहेक और किहुसे फे सत्य जीवित परमेश्वरकठे पुगना उपाय नैहो।” येशूद्वारा केल हमार मुक्ति ओ उद्धार बा, या परमेश्वरक क्रोध, श्राप ओ दण्डसे बाँच सेक्नेबाटी।

जब येशू ख्रीष्ट मृत्युमसे जीवित हुइल, तब सारा प्राणीन्हक प्रभु हुइट कना यिहिमसे प्रमाणित हुइल। येशू ख्रीष्ट सदासर्वदक प्रभु हुइट कना प्रष्ट होरहल। येशू ख्रीष्ट सदासर्वदक राजा हुइट। येशू ख्रीष्ट स्वर्ग ओ पृथ्वीक संरक्षक हुइट। प्रभु येशू प्रत्येक मनैन आपन-आपन पाप अधर्मसे घुम्क उहाँकम विश्वास करट् कना आज्ञा देठ। येशू जीवित होक उठ्ल त स्वर्गम उठागैल ओ आब फेदोस्र उहाँहन विश्वास करुइयन लिह ओ संसारक न्याय कर अइनेबाट। संसारक जौन देशक मनै हुइलसे फे परमेश्वरक आज्ञा अनुसार येशू ख्रीष्टम विश्वास करुइयन उहाँकसँग स्वर्गम रहनेबाट। जहाँ उहाँक पवित्र दूतहुँक फे बाट। तर जे उहाँकम विश्वास नैकरी हुँक अनन्त दण्डक लाग नरकम फाँकजहीं। ओसिन हो कलसे आब का कर्ना त? याकर उत्तर हम्र अइना पाठम पैंनेबाटी।

वास्तविकतक व्यक्तिगत कदम

हम्र एकठो केल सत्य ओ जीवित परमेश्वरक बारेम बात बटोइली, जे पवित्र ओ धर्मी बाट। हम्र पाप, अधर्मक बारेम फे बात बटोइली जौन बात परमेश्वरक नियमक अनाज्ञाकारी हुइना हो।

परमेश्वरक नियम हमन उहाँ कसिन बाट कैक देखाराखल ओ उहाँ यी संसारह कसिक सञ्चालन कठ कना बात फे थाहाँ पैली। एकठो केल सत्य ओ जीवित परमेश्वर मनैन्हक सोच, विचार, भावना ओ कामह घिन मन्ठ काकरकि मनैन्हक सोच काम उहाँक पवित्रतक ओ धार्मिकतक विरोधम बा। एकठो केल सत्य जीवित ओ पवित्र परमेश्वर जे-जे उहाँक आज्ञा पालन नैकरट्ट हुँकन दण्ड देठ। संघारी, उहाँक आज्ञा नैमान्क हम्र पाप कर्तीरली कलसे हमार पाप हमन सड्डभरिक लाग नरकम लैजउइयाबा ओ फेदोस्र एकठो केल सत्य ओ जीवित परमेश्वरह कब्बु फे देखभेट कर नैपैनेहुइटी। यी सब पाप ओ अधर्ममसे शुद्ध ओ पवित्र हुइक लाग येशूक बलिदानक रगतम केल शक्ति बा। येशू ख्रीष्ट अप्णक ओ म्वार पाप, अधर्म क्षमा करक लाग ओ मुक्ति देहक लाग कूसम बलिदान होक मुल ओ मृत्युमसे तीसर दिनम बौरी उठल।

उहाँ सब मनैन पश्चात्ताप करो ओ घुम्क आओ कठ। येशू ख्रीष्ट कठ, “खुशिक खबरम विश्वास कैक लौव जीवन प्राप्त करो।” येशू ख्रीष्ट पापमसे घुम्क विश्वास करो कलक अर्थ का हो? अर्थ यी हो, कि अप्ण आब जौन पाप अधर्मक डगरम नेङ्गटीबाटी उहाँसे घुम्क प्रभु येशूक देखाइल डगरीम नेङ्गना हो। पश्चात्ताप कलक पश्चैटी बैठलरना कहल केल नैहो। एकठो सत्य जीवित परमेश्वर जो हमार करल सारा काम हेटीबाट। पापमसे घुम्ना कलक यी नैहो कि पुरान पापी स्वभावम लौव गुण थप्ना। तर पश्चात्ताप करो कना बातक अर्थ हम्र पूरा मन परिवर्तन कर्ना कलक हो। कत्रा चो हम्र आप्ण इच्छा ओ स्वार्थ पूरा करक लाग रठी। उहओसे हम्र निरन्तर पाप काम कैक परमेश्वरक आज्ञक विरोधम पाप कैरखली। असिक जीना जो हमार जीवन गल्तीम परल रठा। यी सब बातले करबेर परमेश्वर रिसले आगी हुइठ। यदि हम्र आपन-आपन पापमसे नैघुम्ना हो कलसे परमेश्वर दण्ड देहुइयाबाट। जब हम्र पूरा रुपम सड्डभरिक लाग आपन इच्छा छोर्क परमेश्वरक इच्छा अनुसार कर भिठी तब केल हमार पापक पश्चात्ताप हुइठ। हम्र हमार सब विचार, भावना, काम ओ उद्देश्य जौन हम्र आप्ण आनन्दक लाग बनारखलही ओ परमेश्वरक आज्ञा ओ इच्छक विरोधम ज्या कैरखली उ सब चिज छ्वारपठा। परमेश्वर ओसिन जीवनह मनपरैठ, जौन जीवन उहाँक इच्छा अनुसार बा। उहओसे आप्ण जीवन ओ इच्छा छोर्क सत्य ओ जीवित परमेश्वरकठे घुमी। एकठो सत्य ओ जीवित परमेश्वरक दया खोजी। उहाँह खुशी बनाइक लाग हम्र आपन जीवन अर्पण करी। हम्र आपन गलत डगरओसे घुमी ओ

परमेश्वरक डगरीम नेङ्गी। याकर मतलब हम्र सम्पूर्ण रुपले पुरान जीवनमसे लौव जीवनम परिवर्तन हुइना हो। याकर अर्थ हमार जीवनम रहल पुरान चालचलन, आनीबानी, ओ रितिथितिह अन्त्य कर्ना हो। परमेश्वरक वचनम कैगिल बा, “टुन्हक पापमसे घुम्क टुन्हक जीवनक हरेक चिज परमेश्वरह देओ।” याकर अर्थ एक किसिमक पाप या पचास किसिमक पाप कहल नैहो तर हम्र सब पाप काम आब्वहँ सड्डभरिक लाग छोरदेना हो। हम्र आपन स्वार्थक लाग केल जीना ठिक नैहो, काकरकि प्रभु येशू कैरखल, “यदि कौनो मनैया सारा संसार हाँठ पार्क आपन प्राण गुमाइल कलसे ओहीह का फाइदा? अर्थात् कौनो मनैया आपन प्रणक सटाहा और कौन चिज देह सेकी?” प्रभु येशूक पाछ लगना कलक हम्र सब चिज छ्वार पठा कहल हो। प्रभु येशू हमारम अधिकार चलैना योग्यक बाट कैक हम्र बुझपठा। उहाँ ज्या बोळ ओ कठ, हम्र उ सब करपठा। चाहा हम्र आपन इच्छक सब चिज छ्वार पर्लसे फे, जसिन अष्ठारो ओ समस्या रलसे फे, आनन्दसे उहाँक अधीनम रहपठा। हम्र आपन जीवनह आनन्दसे प्रभु येशूम, उहाँक अधीनम देहपठा। हमार जीवनक लाग ज्या असल बा, उहाँ उह केल कठ। काकरकि उहाँ कब्बु फे कुभलो नैकर्ट तर भलाई ओ असल केल कठ। आपन जीवन प्रभु येशूह देनाम हम्र डर जिन मानी ओ शंका फे जिन करी। प्रभु येशू कैरखल, “जे आपनठे रहल सारा चिज छ्वार नैस्याकट उ म्वार चेला हुइही नैस्याकट।” प्रभु येशू हमार हृदय ओ जीवनक प्रभु होक बैठ चहठ। याकर अर्थ उहाँ हमार परिवार, संघारी ओ और सब जहनसे धेर आदरकयोग्य बाटा। प्रभु येशूह जो हम्र आपन जीवनम सबसे महान मानपठा। आबठेसे हम्र आपन इच्छा अनुसार अपन्हेह खुशी पार छोरके प्रभु येशूक इच्छा अनुसार उहाँह जो खुशी पारपठा। आम्हीसम हम्र अपन्हेह मालिक सम्झलरलही। आबठेसे हम्र अपन्हेह सेवक ओ प्रभु येशूह मालिक मानपठा। आम्हीसम हम्र आपन आदर-मान खाजटलही। आबठेसे प्रभु येशूह आदर-मान ओ जीवनक प्रभु मान्क स्वीकार करपठा। ओसिक कर्लसे केल हम्र आपन जीवनम लौव काम ओ लौव लक्षण देखुइयाबाटी। काकरकि आपन पापमसे घुम्क प्रभु येशूह पुकारा करुइयन्हक पाप क्षमा कर्ना ओ अनन्त जीवन देना उहाँ बाचा कैरखल।

हम्र पश्चात्ताप कैक पाछ विश्वाससे यी आशिष पैठी। पैल्ह हम्र पापह छोरके खुशिक खबरम विश्वास करपठा। यदि हम्र येशू ख्रीष्ट केल मुक्ति देहुइया हुइट कना बातम विश्वास कर्ली कलसे, हमन आपन पापमसे शुद्ध हुइक लाग ओ मुक्ति पाइक लाग कहाँ फे तीर्थ धाइ नैपरट्। ओ हम्र आपन पापक क्षमा पाइक लाग कुछु बलिदान फे चहाइनैपरट्। प्रभु येशू म्वार सब पाप क्षमा करक लाग तयार बाट कैक हम्र विश्वास करपठा। प्रभु येशूकम विश्वास कर्ना कलक अचम्मक प्रेमी प्रभु येशूक आज्ञा ओ बाचम अपन्हेह समर्पित कर्ना कहल हो। मनै अनन्त जीवन पैहीं कैक

उहाँ सब मनैन बलैठा। प्रभु येशूकम विश्वास कर्लसे, हमार सारा पाप क्षमा हुइठा काकरकि प्रभु येशू यी संसारम पापी मनैन खोज्क बचाए अइल। उहाँ हम्र सबजहन बचाए अइल। येशू ख्रीष्ट हमार पाप क्षमा करक लाग कलबरीक क्रूसम बलिदानक रुपम आपन प्राण त्यागदेल। यदि हम्र आपन पाप छोर्के उहाँकम विश्वास कठी कलसे, उहाँ हमार पाप क्षमा कर्ना ओ हमन अनन्त जीवन देना बाचा कैरखल। येशू ख्रीष्ट बाहेक और कौनो मनैयाद्वारा फे हम्र पापक क्षमा ओ अनन्त जीवन पाइ नैसेक्टी, काकरकि येशू पापी मनैन खोज्क बचाए अइल। और भगोनोन पापी मनैन खोज्क नाश कर अइल। येशू मुवल मनैन बचाए अइल तर और भगोनोन जीटीह मनैन कटल ओ मुवैल। येशू अपन्हे कैरखल, “डगर, सत्य ओ जीवन मै हुइठु, मैद्वारा बाहेक और कौन मनैद्वारा स्वर्गम पुग (जाई) नैसेक्जाइट।”

परमेश्वरकठे पुगक लाग एक्कठो केल डगर बा, जे येशू ख्रीष्ट हुइटा हेरी संघारी, अप्न कहसेक्ठी, सब डगर एक्क ठाउँम पुगैठा। अप्नह कलकत्ता जाइपर्ना बा कलसे, मुम्बइ जैना टिकट लेलसे अप्न पक्क फे आपत्तम परुइयाबाटी, अप्न हेराजैवी। उहओसे, जहाँ जाइपर्ना बा उहँक टिकट लेहपर्ठा।

मनै दुइ किसिमक डगरीम न्याङ्गट कैक प्रभु येशू कल। एकठो डगर चाक्किर बा। उ डगर मनैन मृत्यु, दण्ड ओ नरकम पुगैठा। ख्रीष्टह नैपाइल मनै चाक्किर डगरीम नेङ्गठ ओ हुँक नरकक दण्ड, दुखकष्टमसे कब्बु फे उम्क नैपैहीं। और डगरजुन साँक्किर बा। यी डगरीम डान्चे मनै केल नेङ्गठ। यी डगरीम नेङ्गुइयन शान्ति, सुरक्षा ओ अनन्त स्वर्ग पैठा। आज हम्र कौन डगरीम न्याङ्गटी? का हम्र चाक्किर डगरीम न्याङ्गटी? उ डगर त बिनाशम पुगैठा। का हम्र आम्हीसम फे आपन पापमसे घुम्क येशू ख्रीष्टकम विश्वास नैकर्ल हुइटी? यदि हम्र यी डरलगिटक चाक्किर डगरीम न्याङ्गटी कलसे, परमेश्वर हमन चेतावनी देहट। पाप ओ अधर्म रहल चाक्किर डगरह छोरदी। एक्कठो सत्य जीवित प्रभु येशूकम विश्वास करी ओ पापक क्षमा पाई।

हेरी संघारी, अप्न उ चाक्किर ओ साँक्किर दुनु डगरीम एक्क समयम न्याङ्ग नैसेक्टी। अप्न एकठो डगर न्वाजपर्ठा, अप्न कि त आपन इच्छा ओ पाप छोर्के येशूक डगरम न्याङ्गपर्ठा। यी धार्मिकतक डगर हो। कि त जुन अप्न अपन्हेह खुशी पर्ना डगरीम न्याङ्गपर्ठा। अप्न एक्क समयम दुइ मालिकन्हक सेवा कर नैसेक्टी। अप्न एक्क समयम धार्मिकता ओ अधार्मिकता दुनु चिजिक सेवा कर नैसेक्टी।

हेरी संघारी, अप्न परमेश्वरक डगरीम आब्वहँसे न्याङ्गटी कि? यदि अप्न सारा हृदयसे आपन पुरान जीवन छ्वार चाहटी कलसे, यिहाँ देगैल् निर्देशन पालन करी।

परमेश्वरह कही, “प्रभु परमेश्वर, मै अप्णक आज्ञक विरोधम पाप कैरखनु, मै आज्ञापालन नैकर्नु, आजसम फे मै आपन इच्छा अनुसार नेङ्गनु, मूर्तिपूजा, मन्त्रतन्त्र कर्नु, महीह यी पापक क्षमा दी। मै आब्वहँ यी सब पाप, अधर्म छोरक सारा मनले अप्णक महिमा केल खोजुइयाबाटु। मै आपन सब मूर्ति छोरक आजठेसे हुँकन्हकम एक विश्वास नैकरुइयाहुइटु तर येशू ख्रीष्टकठे घुम्क अप्णह मै आपन सम्पूर्ण जीवनक प्रभु ओ अनन्त मुक्तिदाता मनुइयाबाटु। मै अप्णकम केल विश्वास करुइयाबाटु। मै अप्णक इच्छा अनुसार जीवन जीए चाहटु ओ अप्णक सेवा, आराधना ओ उपासना कर चाहटु। येशू प्रभु म्वार पापक बलिदान हुइलक लाग अप्णह धन्यवाद बा। मै अप्णह आपन जीवनक प्रभु ओ मुक्तिदाता कैक स्वीकार करटु। म्वार जीवनक प्रभु, अप्ण महीह स्वीकार करी। प्रभु येशू, मै सड्भर अप्णक आज्ञा पालन करक लाग तयार बाटु।” यी प्रार्थना कैक अप्णहेह ख्रीष्ट येशूम समर्पण करी।

हेरी संघारी, येशू ख्रीष्टह विश्वास बिना कर्ल आप्णन उपायले धर्मकर्म कैक मुक्ति पाइ खोज्ना त गधह धोधा पार्क गैया बनाइ ख्वाजअस केल हुइठा।

सिहँरीक पत्या मिस्क शुद्ध दूध बनाइटु कलक त झन वाकर विष लागक हमार हानी केल हुइठा। तर उह पत्या या सिहँर दूध देना छेग्रीन देलसे ओहीह खाक उहीमसे एकदम गुरी, शुद्ध ओ प्वाष लगना दूध बनाक देठ। ओसहँक हमार जीवन, मन, वचन ओ कामले पाप कैक घरपरिवार ओ समाजक लाग तीत ओ विषाहा होरहल। तर हम्र यी मन, आत्मा, प्राण ओ शरीर ख्रीष्टह देलसे तीत ओ विषाहा अवस्थमसे हमार जीवनह शुद्ध ओ मीठ अवस्थम परिवर्तन कैदेठ। संघारी, का अप्ण तयार बाटी?

यी विषयम और जान चाहटी कलसे, अप्ण आपन नाउँ ओ ठेगाना स्पष्टसे लिखक हमन चिठी पठाई। हम्र अप्णह और अध्ययन सामग्री पठादेबी। यदि अप्णक और संघरेन फे यी विषयम जान चहहीं कलसे उहाँहुँकन्हक नाउँ ओ ठेगाना फे हमन पठादी।